

Елімізде бірінші болып бірегей медициналық аппаратты іске қостық

5 сәуір 2013 | 17:04 | Қоғам | Қаралған: 2459 | Пікірлер: 0



Семейде өңірдің әлеуметтік-экономикалық дамуына серпін беретін кәсіпорындар мен әлеуметтік маңызға ие мекемелер көптеп жұмыс істеуде. Ел игілігіне қызмет еткен бұл нысандардың жұмысымен шаһарға арнайы барған облыс Әкімі Бердібек САПАРБАЕВ танысып қайтты.



«Семспецнаб» жауапкершілігі шектеулі серіктестігі – арнайы қызмет киімдерінің түр-түрін тігетін өңірдегі бірден-бір кәсіпорын. Бүгінде ол барлық күш құрылымдарының (әскерилер, ішкі істер органдары, төтенше жағдайлар қызметі, т.б) өкілдеріне, сондай-ақ, «ҚазТрансОйл», «Қазақстан теміржолы» сияқты ұлттық компаниялардың жұмысшыларына арналған киімдерді тігеді. Бүгінде фабрикада үш жүз адам еңбек етеді.

– Бізде екі тігін цехы, бір экспериментальдық және бір кесіп-пішу цехы, тон өндіру цехы бар. Бәрі қажетті құрал-жабдықтармен қамтылған. 2011 жылы жаңадан қондырғылар сатып алып, орнату арқылы шығарылатын тауарлардың түрлерін көбейттік, сапасын арттырдық. Нәтижесінде күніне 200, ал бір айда 8 мың дана костюм шығаруға қол жеткіздік, – деп түсіндірді «Семспецнаб» ЖШС-нің техникалық директоры Айнұр Ахметова.

Техникалық директордың айтуынша, фабриканың табысы күш құрылымдары тарапынан түсетін тапсырысқа тікелей байланысты. Айталық, тігіншілер былтыр 800 миллион теңгенің өнімін шығарса, биыл бұл межеден асып түсу жоспарда бар.

Сырт киімдерге қажетті шикізатты (қой терілерін) кәсіпорын Зайсан ауданынан және Алматы облысының Талдықорған қаласынан, Үшарал өңірінен сатып әкеледі. Ол терілерді өздерінде өңдеп, түстерге бояп, тон-ішіктер тігеді. Мәселен, «ҚазТрансОйл» АҚ-ның тапсырысымен тігілген тондардың бір данасы 36 мың теңге тұрады. Алайда маман сөз арасында ауылдық жерлерде іріктелген сапалы терілер жетіспейтінін де жасырмады.

Отандық өнімдерді шығару жолында тер төгіп келе жатқан фабриканың жұмысымен танысқан облыс Әкімі Бердібек САПАРБАЕВ тауарлардың сапасын жоғары бағалап, мұндай өндірісті қолдап-дамытуға күш салу қажеттігін атап көрсетті.

Бұдан кейін аймақ басшысы Семейде құрылысы аяқталуға жақын қалған жекеменшік емхананың жағдайын көрді. Ғимараттың іші-сыртына қарап жұмыстың сапалы орындалғаны бірден көзге ұрады. Санитарлық және қауіпсіздік нормалары да барлық стандарттарға сай екен. Нысанның толық қолданысқа берілуіне кедергі келтіріп тұрған бір ғана мәселе – бағасы аса қымбат тұратын компьютерлік томография жабдығы. Өзірге оны сатып алуға кәсіпкердің қаражаты жетпейді. Жекеменшік қаржыға салынған тамаша медициналық мекемені аралап көрген облыс Әкімі Бердібек САПАРБАЕВ мұндай тәжірибені өңірдің өзге де қалаларында қолға алу керектігін ескертті.

Талайдың таңдайын қақтырған тағы бір медицина мекемесі – «In Vito+» емханасы жұмыс істеген бес жылдың ішінде семейліктердің мақтанышына айналып үлгеріпті. Бір атап өтерлігі, басы ауырып, балтыры сыздағандардың дертіне шипа, денсаулығына күш-қуат сыйлайтын бұл емхана мемлекеттік емес. Сөйте тұра барлық жағынан алғанда олардан асып түспесе, кем соқпайды. Онда Германия, Италия, Финляндия сынды Еуропаның алдыңғы қатарлы елдерінен әкелінген медициналық оңалту саласындағы жетекші өндірушілердің жабдықтары орнатылған. Ең бастысы, бұл қондырғылардың дені біздің елде бірінші рет қолданылуда.

– Алғашқы жұмысын жоғары деңгейлі зертхана ретінде бастаған емханамыз бүгінде медициналық оңалту саласындағы инновациялық технологиялармен толығуда. Зертханамыз тамаша диагностикалық базамен, әлемдік аренада аса танымал өндіруші компаниялардың озық үлгідегі құрал-жабдықтарымен қамтылған, – дейді «In Vito+» консультативтік-диагностикалық емханасының директоры Нәсиба Изатуллаева.

Бүгінгі күні Шығыс өңірінде жалғыз Семейде ғана жұмыс істейтін заманауи нысанды аралап, емделушілермен тілдескен аймақ басшысы реті келгенде облыстық денсаулық сақтау басқармасының бастығы Вадим Овсянниковке:

– Бұл емхананы мемлекеттік тапсырысқа енгізу керек. Кез келгеннің қалтасы, әсіресе, әлеуметтік жағдайы төмен отбасылар мен зейнеткерлер медициналық қызмет ақысын көтере алмайды ғой. Оның үстіне бұл мекеменің жұмысы күрделі ота жасатқан, инсульт алған, басқа да ауыр жағдайларды бастан кешірген мүмкіндігі шектеулі балалар мен үлкендерді оңалтуға бағытталған, – деп атап көрсетті.

Сондай-ақ, Әкім аталған басқарманың бастығына Өскеменде де дәл осындай қондырғылармен жабдықталған емхана құру үшін тиісті құжаттарды әзірлеуді жүктеді. Осы арада «In Vito+» директоры Нәсиба Изатуллаева бірегей оңалту жабдықтарды өндіруші шетелдік фирмалармен ресми серіктестік байланыс орнатылғанын және қандай да аппаратты сырттан әкелуде ешқандай проблема туындамайтынын айтты.

Мәселен, емханадағы «Vacumed» деп аталатын интервалдық вакуумдық терапияға арналған бірегей аппарат – созылмалы күретамыр жетіспеушілігі, күретамырдың түйіліп кеңеюі, тромбофлебит, аяқтың созылмалы артериялық жетіспеушілігі, алуан түрлі ісіктер тәрізді ауруларды оңай жазады. Германияның аэроғарыштық орталығындағы Ғарыштық медицина институтында жасалған аталмаш аппарат денсаулық сақтаудың барлық салаларында, оның ішінде кардиологияда, оңалтуда,

дерматологияда, эндокринологияда, диабетологияда, тамырлы хирургияда, гинекология мен урологияда қолданылады.

– Емханада көрсетілетін маңызды қызмет түрлерінің бірі – мүгедек жандарды, қарияларды, сонымен бірге күрделі отадан және түрлі жарақаттар алғаннан кейінгі адамдарды оңалту курстары. Емдеу-дене-шынықтыру курстары финляндиялық «HUR» фирмасының пневматикалық күш тренажерлерінің көмегімен іске асырылады. «Табиғи жолмен күш берудің» патенттелген механизмі буындар мен дәнекер ұлпаларды бұзбай, бұлшық еттердің жұмысын қауіпсіз әрі тиімді қалпына келтіреді, – дейді «In Virto+» консультативтік-диагностикалық емханасының коммерциялық директоры Виталий Шевченко.

Кардиохирургия орталығы ашылды

Бұдан кейін облыс Әкімі Бердібек САПАРБАЕВ бұған дейінгі әр жылдар ширегінде Денсаулық сақтау министрі лауазымын атқарған ҰҒА академигі Төрегелді Шарманов және Семей мемлекеттік медициналық университеті бақылаушы кеңесінің төрағасы Василий Девятко, қаланың Құрметті азаматы Хафиз Матаевпен бірге аталған жоғары оқу орнының медицина орталығында ашылған кардиохирургия және ангиографиялық зертхана бөлімшесінің ашылуы салтанатына қатысты. Кардиохирургиялық ота жасайтын аппараттар сатып алуға мемлекеттік бюджеттен 1,5 миллиард теңге қаражат бөлінген.

Осының арқасында бұған дейін тек кеңес берумен шектеліп келген жергілікті дәрігерлер енді мұқтаж адамдарға күрделі оталар жасауға мүмкіндік алып отыр. Бұл жүрек-қан тамырлары ауруларының қатары сиремей тұрған Семей өңірі үшін үлкен жетістік. Науқастар енді бұрынғыдай алыс қалаларға сабылмай өзімізде жатып-ақ емделе алады.

Естеріңізде болса, бұған дейін Астанадағы Ұлттық кардиохирургия ғылыми орталығының төрағасы Юрий Пя бастаған мамандар осында бірнеше рет келіп, семейлік әріптестеріне шеберлік сабақтарын өткізсе, біздің дәрігерлер елордаға барып, білімдерін жетілдіріп, тәжірибелерін шыңдап қайтқан-ды. Бұл күні орталыққа тұрақты қызметке Астана мен Өскемен қалаларынан екі білікті хирург алынған.

– Экономиканың негізгі тірегі – адамдардың денсаулығы. Сондықтан кардиохирургиялық орталықтың ашылуы, әсіресе, ядролық сынақтардан зардап шеккен Семей өңірі жұртшылығы үшін маңызы зор. Осындай игі істің жүзеге асуына қолдау білдірген облыс басшылығына ризашылығым шексіз. Осы оң үрдіс әрі қарай жалғасын таба берсін, – дейді академик Төрегелді Шарманов.

Ақ халаттылардың айтуынша, ядролық полигонның өрті жалмаған Семей өлкесіндегі өлім-жітім негізгі себебінің бірі жүрек-қан тамыры ауруымен байланысты көрінеді. Бүгінде бұл сырқатқа осы өңірде 5 мыңға жуық адам шалдыққан болса, оның 3 мыңы арнайы есепке алыныпты. Аталған орталық осы науқастардың дертіне шипа тауып береді деген үмітте мамандар.